

欽
定
全
唐
文

欽定全唐文卷七十八目錄

武宗三

即位赦文

南郊改元赦文

加尊號赦文

加尊號後郊天赦文

九天生神保命齋詞

欽定全唐文卷七十八

武宗三

即位赦文

朕粵自藩邸來握乾符銜哀受遺當宁興感永惟我高祖
太宗艱難創業其後列聖奕葉重光英睿相繼洎於先帝
秉文之德光闡皇猷將洽理平甫臻仁壽顧予冲昧叨承
大統祇命若臨於泉谷思理未詳於政刑空懷濟物之心
將纘已成之業所尚者節儉所寶者忠良肆眚法解網之
仁厚生敷流澤之惠上憑靈祉下便物情期中外以叶心

冀遐邇而咸乂爰遵典訓特沛鴻恩諒表政於惟新敢忘
憂於馭朽可大赦天下自開成五年二月八日昧爽已前
大辟罪已下罪無輕重咸赦除之惟十惡叛逆故殺人官
典犯賊不在此限

南郊改元赦文

門下古之令主肇建皇極莫不嚴禋郊廟統和神人將以
承上天之眷命告下土之率服恪有令典留爲後法是以
太陽施光調無私之臨照和風扇物樂有截之生靈明察
爲先誠敬攸屬斯道不遠宏之在予朕以寡昧入奉丕構

應三靈之協慶祇一德以咸美代邸樂推賴元臣忠力虞
琴方鼓冀萬國歡心顧以涉道多闕惕若馭朽凜如蹈水
納隍勤誠勵之懷置器審安危之地苟一物失所時予之
深辜粵以獻歲吉辰禋祀上帝烟燎旣達牲幣克修百神
受職而敬恭六合承休而霈洽禮成而退慶孰大焉思與
公卿大夫內外臣庶導迎善氣同我休嘉變生人之耳目
振大化之綱紀立號垂統自中形外延八表之洪福敬五
始之惟新事天之禮旣因高以薦誠及物之恩宜順時以
布澤可大赦天下改開成六年爲會昌元年

加尊號赦文

門下昔我高祖太宗始造區夏闢乾坤以覆載揭日月以
照臨盛德耿光格於上下昊天有成命我二后受之列聖
丕圖克大其緒文綏武靖奕葉連枝逮予纘修罔敢失墜
誠欲追蹤在昔貽範將來陶末俗於至和返大樸於已散
而道不足以居域中之大文不足以成天下之化恭己南
面夙興夕惕遐思理古歉然於懷至於嗣歲豐穰寰海康
靜祇沴滅息華夷大同茲實監祐自天匡救在下諒非已
出安敢自多而三台百辟陳忠瀝懇加我大號其何以堪

謂予守文宜述先志抑而不行者三請確而不拔者羣誠
豈貪在己之名姑念從人之欲祇膺典冊良深惕勵於戲
顏子匹夫也猶曰舜何人哉矧有其位行其教化而不思
齊其道也尚念交修俾克用乂今維夏長養之時動植之
物莫不自遂思有以導迎和氣生活吾人是用稽犧經之
作解法虞書之肆赦推恩宥過思與同休可大赦天下自
會昌二年四月二十三日昧爽已前大辟罪已下已發覺
未發覺已結正未結正繫囚見徒罪無輕重咸赦除之惟
犯十惡叛逆已上故殺人及官典犯贓不在此限應左降

官恩赦後未經量移者與量移近處丁憂去任服闋日亦與量移如準前制已合量移有司未注擬者速與處分流人未到所在及已到未經量移者並與量移近處僧尼道士移隸未經量移者亦與量移近處中外前資見任官頃因延累未及用才并左降官中有事情可恕名跡素聞者宜委中書門下量加獎用勿使屈滯俗未臻於富庶念每切於黎元衣食寡充肝旻興歎百司田疇地有高低歲有善惡傷於水潦則低田不稔稍遇亢旱即高處無苗近聞州縣長吏掩其災損務求辦集惟於熟苗上加徵將填欠

數致使黎元重困惠養全乖自今後州縣百姓有遭水旱
苗稼不收處檢驗不虛便準前後勅文破免不得加徵熟
田人戶令本配額外重出斛斗商通百貨士奉公程俾無
行旅之虞在去萑蒲之聚應州郡連帶江湖常多寇盜結
搆羣黨潛蓄弓劍殘害平人剽劫財物道途商賈常患不
安方今海內無虞所宜普湊委諸道節度防禦使如界內
帶江山淮海處切加警備仍差巡檢更於要害處加置軍
鎮捉搦擇有機略軍將鎮守遊奕明立賞罰如能設計擒
獲賊黨二十人已上并獲贓物推問行劫蹤跡分明者量

其功績節級優賞仍與遷職如界內有劫殺不能捉獲者亦節級重加懲責仍委出使郎官御史及所在巡檢院切加察訪不得更使因循邊戍禦扞戎夷士卒衣糧最爲切事如聞逃亡浸廣營壘多虛又供給公私皆率官健妻孥困乏不免饑寒委本道節度使與監軍使躬親點閱據逃死欠闕人數便取軍中少壯有武藝子弟填替不得遣有虛名其見在將士衣糧皆須及時給付正身不得輒有減刻別將支用令其凍餒仍委出使郎官訪察聞奏有違當案覆科貶抑強扶弱實王道所先賦役以均則窮人靡怨

度支鹽鐵戶部諸色所由茶油鹽商人準勅例條免戶內
差役天下州縣豪宿之家皆名屬倉場鹽院以避徭役或
有違犯條法州縣不敢追呼以此富屋皆趨倖門貧者偏
當使役其中亦有影庇真偽難分自今已後委本司條疏
應屬三司及茶鹽商人各據所在場鹽正額人名牒報本
貫州縣準勅文處分其茶鹽商仍定勛石多少以爲限約
其有冒名接腳短販零少者不在此限其小鋪所由主人
牙郎火夫牛戶父兄子弟并在任州縣依例使例所冀勞
逸稍均疲人蘇息給事郊廟之服奉繭稱絲之稅蠶桑是

繫封植攸資宜設科條用絕違犯勤課種桑比有勅令每
年奏聞如聞都不遵行恣爲翦伐列於市肆鬻爲柴薪州
縣宜禁斷不得輒許更賣犯者科違勅罪理貴便人事存
可久苟非撫實則昧適時州府兩稅物斛斗每年各有定
額徵科之日皆申省司除上供之外留後留州任於額內
方圖給用縱有餘羨亦許州使留備水旱其留使錢物更
令諸道分析破用去處所立文帳皆是構虛文百姓墾田
承前已申頃畝及斛斗單數近年又令其人戶稅錢等第
墾田水陸頃畝挾縣鄉分析徒爲繁弊無益政途今年已

後並宜停送州縣攝官假名求食尚懷苟且不卹疲人其
闕少官員處並委本州刺史於當州諸縣見任官中量閒
劇分配公事勾當如官員數少力實不逮處即於前資官
中選擇清謹幹用者差攝不得取散試官充職制祿授田
著於定制貪猾利己不修舊章應畿內在京百司職田方
聞本地多被狡吏及豪強平直隱蔽迴換遙指荒閒墾薄
田地即配與浮客佃食免被豪吏欺隱如或因循不存勾
當官吏等必當節級處分使命經行供備夫役旣隲額例
事頗姦欺須議舉明以全物力江淮兩浙每驛供使水夫

價錢舊例約十五千已來使過元額須別供船夫近日相承取索無度從蘇常已南每驛便供四十餘千或界內或四五驛往來須破四五百千宜依往例不得數外妄供如更有違長吏已下節級書罪立政之本所務均平設法之源在絕僥倖京畿諸縣太常樂人及金吾角子皆是富饒之戶其數至多今一身屬太常金吾一門盡免雜差役今日已後只放正身一人差使其家下並不在影庇限涉厯吏事蓋崇理本自因近制卻啟倖門太和九年十二月十八日勅進士初合格並令授諸州府參軍及緊縣簿尉未

經兩考不許奏職蓋以科第之人必宏理化黎元之弊欲使諳詳非惟可塞倖門實亦用懲澆俗近者諸州長吏漸不遵承雖注縣僚多縻使職苟從知己不顧蒸人流例寢成侵費不少況去年選格更改新條許本郡奏官便當府充職一人從事兩請料錢虛占吏曹正員不親本任公事其進士宜至合選年諸道依資奏授州縣官即不在兼職之限武官選用本求才藝近日入仕多門虛僞轉甚就中兵部武選其弊尤深都無本根妄兼甲歷但求遷轉莫可討尋其武選且停見任武官即仰依前守職仍差官量與

修甲厯得甲厯定然後許前資赴集輦轂之下諸色人中
非吏非商閒行遊手總名趁事潛得容奸自今後有自謀
職任私用貨財詭計多端經過朝貴者委御史臺京兆府
嚴加察訪捉搦畿甸賦繁園陵至重先事立制冀免虛勞
親陵柏栽每歲添補約力計費役用至多歲久而不見其
功人勞而未除其弊蓋由栽植動土須先奏聞待勅下有
司及擇日到縣已過期限豈盡施功空閱數以計傭皆朝
種而夕朽自今已後每至歲首委有司於正月二月三月
八月四箇月內擇動土利便之日先下奉陵諸縣分明榜

示百姓至時與設法栽植畢月縣司與守管使同點檢據數牒報與折本戶稅錢高秩峻級榮蔭子孫蓋寵勞能著存令式近者漸寡廉樸多補名身不獨假蔭近房兼有規求厚利選曹旣闕磨勘長吏不聞糾繩此弊公行吏途太濫自今後並須準格用蔭人數年限不得逾越委吏部及御史臺嚴加覺察據其選授官到本道本州須審磨勘稍疑踰濫及察知冒賣資蔭便收禁牒報有司懋官述職禦侮申威暨於庶僚咸竭乃力峻其爵級以極封崇内外文武見任及致仕官三品已上賜爵一級四品已下加一階

仍賜勲兩轉神策六軍金吾威遠皇城將士普恩之外各
賜勲兩轉位列虞賓冑崇褒聖所以闡德教而昭前烈也
二王三恪及文宣公各賜物五十匹二廣拱辰五營列衛
明庭執玉航海會朝念申力以賞勞示懷柔而優寵神策
及六軍金吾威遠皇城等諸軍將軍統軍已下各賜物有
差鴻臚禮賓院應在城內蕃客等并節級有賜物光贊典
冊發揮鴻名實賴重臣共揚休烈爰推恩以廣愛亦峻給
以崇階攝侍中讀寶官中書侍郎平章事李紳攝中書令
讀冊官右僕射兼中書侍郎平章事崔珙各賜一子出身

撰冊文官司空兼門下侍郎平章事李德裕賜一子出身
正員官奉寶綬官書玉冊官書寶官各加兩階進寶綬進
中嚴外辦禮儀贊導押寶冊官各加一階其應職掌行事
官三品及寫制官太常修儀注禮官并內行事官三品已
上賜爵一級四品已下加一階仍并賜勲一轉鑄造寶冊
并填金字造寶裝玉冊官各賜物五十段養老引年旌閭
表行冀宏忠厚之俗以振節義之風天下百姓年九十已
上委所在長吏量加存問孝子順孫義夫節婦旌表門閭
終身勿事先已旌表者亦量加優卹降神表峻出寶應圖

秩視公侯德禳災患式崇明祀咸薦吉蠲五岳四瀆宜委
本州長吏備禮致祭名山大川自古聖帝明王忠臣烈士
各令所在以禮致祭亡命山澤挾藏軍器百日不首復罪
如初赦書有所不該者所司具作條例奏聞敢以赦前事
相告言者以其罪罪之赦書日行五百里布告天下咸使
聞知主者施行

加尊號後郊天赦文

門下王者事帝必嚴禋祀之容臣下歸功爰極推崇之義
旣膺鴻號式展盛儀因時布和順歲更始前聖垂範後人

是遵矧以眇身幸逢昌運雖履冰惟懼而涉道未周繫我
輔臣洎茲列岳內盡交修之志外分共理之憂乃者虜衆
乖離部族欸附救帝子於氊裘之所致名王爲冠帶之臣
堅昆來朝不遠萬里夷貊嚮化克同九州重以上黨狂童
竊襲叛跡問罪之師旣集元凶之首遂梟廓清亂風洗滌
汙俗翦逆弁而故都底定竄摩尼而壞法永除由是退惡
進賢化行令舉刑姦賊之吏破黷貨之家此皆宗社降靈
助成時政豈朕涼德獨擅厥功而中外誠臣文武多士累
陳懇䟽再舉鴻名辭不獲從被此虛美是用虔告清廟明

禮上元烟燎所升靈貺如答旣展郊禮重申國經宜因行
慶之辰誕布惟新之令同我景福永孚於休可大赦天下
自會昌五年正月三日昧爽已前大辟罪已下罪無輕重
已發覺未發覺已結正未結正繫囚見徒常赦所不原者
咸赦除之惟犯十惡反逆已上及故殺人官典犯入已贓
持仗行劫縱不殺人並不在免限左降官量移近處已經
量移者更與量移如已在近處未復資者有司別條聞奏
如復資者五品已上中書門下速與處分六品已下依常
調選丁憂去任服闋日亦與量移如有親故在上都任於

所司陳狀便與處分不必更待本州府申請從九月二十九日降郊禮勅後流貶人不在此例兼比來與劉稹楊弁同謀惡逆配流及伏法身死有父兄子弟及諸親族等配流者並不在放還及量移之限別勅因責授降資正員官未經轉者量與進改亡官失爵放歸不齒者量加收敘縱元勅云終身不齒者亦量與收敘流人未到所在及已到者並放還惟降死從流者與移近地如收敘者量才錄用并僧尼道士移隸者亦放還其情狀難容者不在量移及放還之限得罪人已亡歿家口未許歸者一切放歸如自

情願住者亦任諸色得罪人中如先有勅云縱逢恩赦不在免限者并別勅安置者亦委中書門下量事狀輕重節級處分左降官及流人先有官者如已亡歿各還本官流貶及諸色等罪人所有在任身亡任其親故收以歸葬仍仰州縣量給棺槨優當發遣近年將相及任事之臣如因事貶降身已淪沒情理屈者並量與追贈諸色人中有痕累禁錮及逃匿者一切並與洗滌應昭義逆黨親族除已處置外其他素不同謀者並一切不問常參官及諸色刺史先因停替及以病解免終制未授官者委中書門下量

才進擬勿令稽遲國家與吐蕃甥舅之好彼此無虞自今
後邊上不得受納投降人並擒捉生口功蓋本朝賞延後
嗣是加恩禮用勸臣心故尚父汾陽王贈太師晟贈太尉
秀實贈司徒顏杲卿贈太師顏真卿許遠張巡南霽雲子
孫中未經甄獎者每家與一人出身耕桑豐約上應徵租
泉貨輕重宜均物力丁徭若絕其影占組織又去其纖奇
則農桑無荒女工斯勸京畿百姓應兩稅及青苗地頭納
見錢等充給府縣官吏及諸色支用今天下諸州所納兩
稅皆據分數納見錢除納省估匹段給用之日錢貨並行

其京畿應納諸色錢等許納諸州及本土上色絹每匹與折八百文充官吏料錢及諸色給用京畿今年夏稅麥數內每斗放五勝京兆府諸縣應欠開成五年終已前青苗榷酒秋夏品送府倉正稅地租百官職田資百姓種糧戶部和糴變色粟驛蓄科稗草麴麩並放免畿內條稅百姓準元和二年八月二十五日勅及會昌元年正月九日赦節文計戶內丁數多少充諸司盡稱子弟致令鄉縣所由無人差役各委諸軍諸使司準前後勅文收補仍具姓名奏聞勅下京兆府重磨勘如有人戶違越妄託屬諸軍諸

使不準勅文影占收補者並準前後勅文處分諸使諸軍
諸司人在鄉村及坊市店舍經紀準前後赦文收與百姓
一例差科不得妄有影占應屬官莊宅使司人戶在店內
及店門外經紀求利承前不復隨百姓例差科者從今後
並與諸軍諸使一例準百姓例供應差科畿內諸縣百姓
租佃百官職田地訪聞其中有承虛名配佃多時縣司但
據額徵收租子或無本地及被形勢莊園將墾薄田地迴
換令人戶虛頭納子歲月既久無因申明各委縣令子細
磨勘別立簿書具明段四至申報仍委當司審字關一勘會

分析奏聞畿內諸縣鄉村及城內坊市人戶不是正額食糧官健及非工巧之徒假以他名諸司諸使影占納課其數至多各本司釐革凡是納課人戶並停解送歸本縣收入色役京畿內近日足陌用錢惟益富室匹帛苦賤反害疲人宜卻令依前行墊陌錢每墊八十文其公私交關五貫已上令一半折用匹帛武功旣暢經術是修宜闡儒風以宏教化應公卿百僚子弟及京畿內土人寄客修明經進士業者並隸名太學每一季一度據名籍分番於國子監試帖三度帖經全通者即是經藝已熟向後更不用帖

試如三度全不通及三度託事故不就試者便落下名籍至貢舉時不在送省之限其外寄居及土著人修進士明經業者並隸名所在官學仍委長吏於見任官及本土著學行人中選一人充試官亦委每季一試餘並準前處分如無經藝雖有文章不在送省之限所冀人皆嚮道學務通經職局官常各宜歸正詳刑決獄豈可容姦在京諸司典吏考滿合赴選者官成後皆作計勾留不肯赴任今日已後官成後便勒赴任本司不至各令本司釐正不得奏請勾留如一年選不成者且勒依舊執行文案至二年選

不成者勒停守選諸州府有遺攝官及職掌人推案刑獄比及刑部詳斷其間或節目不盡或予奪用情將有勘尋便稱停罷向後諸州府推事並須差見任官仍在兩考內者其刑部大理法直並以明法出身人充據律已去任者公罪流已下勿論公罪之條情有輕重苟涉欺詐豈得勿論向後公罪有情狀難恕者並不在勿論之限上柱國前代烈勲謂之八柱品居第一宜峻寵章向後非特恩不在累敘之限近日諸道奏官其數至廣非惟有侵選部實亦頗啟倖門向後淮南兩浙宣鄂洪潭荆襄等道並不得更

有奏請其三川邊鎮河南北地遠官無選人肯去闕員稍多處即任量要切奏請仍每道一歲不得過七員應諸道軍將昨緣酬獎戰功多授正秩今日已後非因戰功不得請正官其已有正官者或因停替亦須待三五年後方得奏請比來山劔湖嶺間刺史多居周行散位日久而選縣佐率是諸曹胥徒年滿則授生人舒慘屬在此流朝廷典章罕能具舉自今已後每除湖嶺山劔南間刺史取其流品稍高兼曾歷三四任已上州官者如有政績委本道觀察使具以名聞其遠處縣邑多是中下縣其縣丞簿尉等

例是入流令史苟求自利豈知官業其中下縣丞中縣簿等自今已後有衣冠士流經業出身經五選如願授者每年便許吏部投牒依當選人例下文書磨勘注擬如到任清白幹能刺史申本道觀察使每年至終使司都爲一狀申中書門下得替已後許使上縣簿尉選數赴選與第二任好官三衙官中名本於宿衛當番就役其事甚徵疑每年兵部選時號爲文簡合選之數全淺於明經齋郎注擬之時爭先於諸親宗子其於踰濫莫甚於斯入仕之門此途最弊自今已後但令武簡其文簡並停宗子每因恩澤

皆賜出身自幼授官多不求學未詳典法頗有愆違委宗正寺收補明經每年許參三十人出身同兩館例與補各搜圖籍精驗源流明爲保舉不得容有踰濫仍一季一度試帖經餘並進士明經條例處分京師佛刹相望其數已多旣臨康莊足壯都邑近緣䟽理僧尼訪聞大寺房院半已空閒其坊內小寺或產業素貧或殿宇摧毀僧數旣少不足住持併合同居事從簡當委功德使條䟽各具去著名額奏聞其所拆寺僧尼如行迹非違不守佛之禁戒者亦宜揀選勒令還俗仍依前勅處分兼具數聞奏其餘僧

尼即令移入側近大寺有房院居住又京城諸市亦不盡有產業就中即有富寺今旣䟽理僧尼兼停修造所入厚利恐皆枉破委功德使檢責富寺邸店多處除計料供常住外賸者便勒貨賣不得廣占求利侵奪疲人所去不均之患冀合哀多之義又諸州府所申還俗僧尼已有定額若無私度日當減耗諸道每至年終各具見在僧尼數申省其續有死亡及犯事還俗并分析申報本司磨勘奏聞如聞兩浙宣鄂潭洪福三川等道緣地稍僻姑務寬容僧尼之中尚多踰濫委長吏更加揀其有年少無戒行者雖

先在保內亦須沙汰古者受祿之家食祿而已不與人爭業然後利可均布人可家足如聞朝列衣冠或代承華胄或在清途私置質庫樓店與人爭利今日已後並禁斷仍委御史臺察訪聞奏如聞兩川稅租盡納見錢蓋緣人多伎巧物皆纖麗凡所織作不任軍資所以人轉困窮俗增侈靡然以風土所習頓革稍難委刺史與縣令商量勸課有機杼之家依果閬州且織重絹仍與作三等估上估一貫一百下估九百待此法行後每年兩稅一半與折納重絹即冀人少蘇息軍用不虧或因宦遊遂輕土著戶籍既

減征徭難均江淮客戶及逃移規避戶稅等人比來皆係
兩稅並無差役或本州百姓子弟纔霑一官及官滿後移
住隣州兼於諸軍諸使假職便稱衣冠戶廣置資產輸稅
全輕便免諸色差役其本鄉家業漸自典賣以破戶籍所
以正稅百姓日減州縣色役漸少從今已後江淮百姓非
前進士及登科有名聞者縱因官罷職居別州寄住亦不
稱爲衣冠戶其差科色役並同當處百姓流例處分除盜
懲姦在去其枝葉校功責課必削其根本如聞江淮諸道
私鹽賊盜多結羣黨兼持兵仗劫盜及販賣私鹽因緣便

爲大劫江賊有仗者雖未殺人不在該恩之限又逃還復業戶雖先有格令近來多因刺史縣令務虛名者招攜逃戶侵奪已成產業轉令居者不安姦人得計苟求非時考課虛申招復逃亡及至定稅徵科依前逃散稅錢緣已申省使即須攤配疲人從今已後應諸州縣逃戶經二百日不歸復者其桑產居業便招收承佃戶輸納其逃戶縱歸復者不在論理之限其有稱未逃之時典貼錢數未當本價者便於所典買人戶下據戶加稅亦不在卻收索及徵錢之限義重維城慶流多葉敘睦之道寵渥惟宜中外羣

僚文武多士或郊裡奉職或局署業官各洽恩波以類申
典亞獻撫王紘等各賜物一百匹夾侍正衣進珪捧珪各
賜物五十匹亞獻終獻正衣各賜物四十匹大長公主公
主嗣王郡主縣主各有賜物内外文武見任及致仕官三
品已上賜爵一級四品已下加一階合入三品五品欠考
未合敘者待考足日聽敘孔氏行教折中於百王虞賓展
敬不廢於千古敢怠咨稟爰用襲明文宣王之後及二王
三恪與一子出身各賜物五十匹其祠廟委所司量加修
飾堯稱睦族漢貴推恩在明廣敬之義式展奉親之孝太

皇太后二等已上親皇三等已上親委中書門下各擇有才行者量與改官如無堪獎用者即不必與改皇五等已下親及三品已上賜爵一級五品已上加一階六品已下及前資常選散官簡選日優與處分應陪位皇五等已上親及太皇太后皇太后三等已上親三品已上賜爵一級四品已下加一階四等五等親并諸色陪位官五品已上加一階六品已下及白身並賜勲兩轉其前資及有出身各減一選前聖立言教人以孝慶覃存沒禮洽閨門俾奉高堂之榮用霑漏泉之澤常參官及諸州府長官父母見

存未有官封者並量與三品致仕官及階并邑號如已有官封者並量與進改如官已至五品已上者即與五品階父母已歿未經追贈者量與贈官及邑號公台輔弼柱石列藩俾宏追飾之恩仍昭賞延之典加於存沒用洽寵章中書門下及節度使帶平章事者宜與一子正員八品官祖父母先亡歿各與追贈已經贈者更與改贈破迴鶻及攻討昭義立功節度使不帶平章事者及劉沔李思忠各與一子正員九品官節度使東都留守度支鹽鐵觀察處置諸防禦經略招討使及神策金吾六軍將大將軍威遠

鎮國等使皇城留守各與一子出身父母先亡歿未經追贈者各與追贈禮儀使京兆尹各與一子出身寅奉典冊肅恭明禋或勤贊相之義或專扈從之禮時當慶澤豈愜恩華應郊廟升壇升殿行事官普恩之外中書門下尚書省御史臺三品已上特加一階四品已下各賜一階如合入三品者量減三考入五品者量減二考仍待考足日聽敘其合選人與減一選內行事官三品已上更賜爵一級四品已下更加一階內侍省及內坊官四品已上各賜勲五轉應從駕至郊廟者普恩之外三品已上賜爵一級四

品已下各加一階白身賜勲兩轉攝侍中讀寶官攝中書
令讀冊官各賜一子出身撰冊文官賜一子正員官奉冊
奉寶綬官書玉冊官書寶官各加二階進寶綬進冊進中
嚴外辦禮儀贊導押冊押寶綬舉昇寶冊官各加一階合
選人減一選其餘應職掌行事官及寫制書官太常修撰
儀注禮官并內行事官三品已上賜爵一級四品已下加
一階仍并賜勲一轉鑄造玉冊并填金字造裝玉冊官各
賜物五十段禁營軍師信宿警衛宜頒慶賚以獎勲勞神
策六軍威遠營左右金吾及皇城將士應緣大禮儀仗宿

衛御樓立仗等普恩之外三品已上賜爵一級四品已下加一階仍準舊例賜物有差其神策將士應在京畿諸縣者亦各有賜應緣大禮職掌行事官并修撰儀注及留守副留守守倉庫卿等普恩之外三品已上賜爵一級四品已下各加一階梯航奔走慕化在庭藩岳奏陳不虧奉職勤勞禁署已積歲時鴻臚禮賓院應在城內蕃客等各有賜物諸道知上都進奏院官在城者各賜勲三轉應緣大禮四方進表疏及賀正官各賜勲三轉翰林待詔供奉并諸色直見任及前資并員外試官三品已上賜爵一級四

品已下各加一階無官者賜勲兩轉祠薦展儀掌贊供事
恪勤無怠甄獎宜申郊廟行事齋郎減兩年勞至室長掌
座禮生贊者便放出身崇元館行事學生及齋郎禮生番
考已滿所司緣大禮卻追入行事各減一選國子監學生
陪位者賜勲一轉中書門下專知儀制官各特加一階應
緣祇供作官直司長上諸州行綱考典兩縣耆壽諸色番
役當上在城并量留十二月番者各賜勲兩轉飛龍閑廐
宮苑典引掌扇內園總監裁接少府將作內中尚武德軍
器內外弓箭庫等諸司諸使下白身及無品直司定額長

上雜匠巧兒黃衣長上監門直長雜仗三衛七色引駕細
引執扇手角手弩手彊騎武士天文觀生漏生典鼓典鐘
工人樂人主衣主膳主酪典食胡食手宰手掌閑幕士御
士醫工獸醫門僕藥僮御書手楷書手典書外行署等各
賜勲一轉耆老加惠著在前經節義所襲用明古道天下
百姓年九十已上委所在長吏以留州物量加存恤孝子
順孫義夫節婦旌表門閭終身勿事先已旌表者亦量加
優恤公卿視秩靈瑞降祥生植所資導利庶物五岳四瀆
宜委本州府長吏備禮獻祭助宣和氣福我黎人將達精

誠在嚴祀事名山大川及自古聖帝明王忠臣烈士各令所在以禮致祭亡命山澤挾藏軍器百日不首復罪如初赦書有所不該者所司具條例聞奏敢以赦前事相告言者以其罪罪之赦書日行五百里布告天下咸使聞知主者施行

九天生神保命齋詞

維大唐會昌五年歲次乙丑十月乙亥朔十四日戊子仁聖文武章天成功神德明道大孝皇帝臣某謹稽首再拜虔誠上啟至真無極大道元始天尊太上大道玉晨君大

聖祖高上大道金闕元元天皇帝太上老君玉清大有
天寶君上清元妙靈寶君太清太極神寶君三寶尊神三
寶丈人元都紫微九天太帝君東華南極西靈北真四天
君三十六天帝三十二天君十方靈寶至極天尊五老上
帝三景君道德衆聖三元君太帝天帝天師君元洞至極
明皇道君三十六部尊經元中大法師三光衆聖八景靈
君三十六地嶽瀆正神河海川澤名洞靈山諸化福地得
道神仙三界應感一切真靈臣聞萬化之初總之者妙道
羣靈之表冠之者至真剖判元黃裁成品彙幽明旣辨主

宰有倫九皇司牧以無爲八帝統臨而有度泊乎清源斯
壅元澤不流舜禹違揖讓之風湯武起干戈之役禮樂隳
於大樸俎豆矜其小成玉帛徒美於爭馳世道亦悲於交
喪斯所謂時君忘本至理莫追悠悠含生眇然何怙是知
凝旒負扆非道無以寧至理垂裳非德無以立我國家元
元錫祐仙李標華承德明興聖之基紹高祖太宗之業庭
除六合簷廡九圍扇之以薰和沐之以渥澤致之以聲教
正之以詩書惠露洽於幽陰百神咸秩仁照周於萌蘖大
樂同和越二百年一臻於道顧惟涼德祇嗣洪圖思宏清

淨之規以布寰瀛之福冥心丹簡屬想元經披太上九天
之文得元洞生神之旨將膺寶籙首備齋壇錦幣華繒金
龍白璧普萬天而展禮極三境而告虔所期肸鬻咸通昭
彰會祉鸛林鰈水咸歸仁壽之鄉海外域中一變華胥之
俗豈使燕昭臺上獨寧三素之雲漢武殿前嘗降九靈之
駕蓋保綏於億兆非企慕於騫騰列聖衆真鑒茲沖懇謹
遣道士東嶽先生修九天寶齋三日四夜稽首以聞謹詞

欽定全唐文卷七十九目錄

宣宗一

授李德裕荆南節度平章事制

刺史以戶口增減定賞罰制

委觀察選擇縣令制

封吳氏等爲昭儀等制

封長女等爲公主制

貶李德裕潮州司馬制

召募閒田制

貶李回太子賓客分司東都制

貶李回賀州刺史制

收復河湟制

再貶李德裕崖州司戶參軍制

貶崔珙太子少師分司東都制

授濮王澤成德軍節度使制

授唐技虔州刺史裴紳申州刺史制

授鄭涯義武軍節度使制

加盧鈞尚書左僕射制

授崔鉉淮南節度使平章事制

授令狐綯太清宮使魏謩監修國史裴休集賢殿

大學士制

授令狐綯宏文館大學士制

授鄭涯山南東道節度使制

除鄭朗工部尚書同平章事制

授畢誠昭義節度使制

授崔慎由平章事制

授魏謩西川節度使平章事制

授鄭朗監修國史崔慎由集賢殿大學士制

封衛王灌等制

欽定全唐文卷七十九

宣宗皇帝

帝諱忱憲宗第十三子元和五年生長慶元年三月封光
王名怡會昌六年三月立爲皇太叔翌日即位改今名大
中二年正月上尊號聖敬文思和武光孝皇帝在位十三
年年五十謚曰聖武獻文孝皇帝咸通十三年加謚元聖
至明成武獻文睿智章仁神聰懿道大孝皇帝廟號宣宗
授李德裕荆南節度平章事制

將相之任中外攸屬入則揚緝熙以正百度出則布威令

以靖一方易以才難委寄咸重爰設齋壇之禮仍合台席
之榮式示酬勞允諧僉望特進守太尉兼門下侍郎同中
書門下平章事充宏文館大學士太清宮使上柱國衛國
公食邑三千戶李德裕嶽瀆間氣鐘磬正音葆粹孕和本
仁叶義道蘊賢人之業正爲王者之師詞鋒莫當學海難
測自入膺大任克構崇庸王猷國經契合彝矩丙吉罄安
邊之術虜寇殄夷張華興伐叛之謀壺關洞啟克荷先朝
之旨弼成底定之功布在冊書輝映前古而能處劇不懈
久次彌勤朕以嗣位之初懋勤在念宜先碩望以表優恩

荆部雄藩地惟西楚總五都之要會包七澤之奧區兵賦殷繁居旅甚衆必藉舊德作鎮尹臨載崇五教之名俾賦十連之貴勉宏化理以續前勞可檢校司徒同中書門下平章事兼江陵尹充荆南節度觀察處置等使

刺史以戶口增減定賞罰制

刺史交代之時非因災沴大郡走失七百戶已上小郡走失百戶已上者三年不得錄使兼不得更與理人官增加一千戶已上者與超資遷改仍令觀察使審勘詣實聞奏如涉虛妄本判官重加懲責

委觀察選擇縣令制

縣令員數至廣朝廷難悉諳知吏部三銓祇憑資考訪於近日多不得人委觀察使於前資攝官內精加選擇當具薦論如後犯贓連坐所舉人及判官重加懲責

封吳氏等爲昭儀等制

吳氏可封昭儀張氏可封婕妤晁氏梁氏並可封美人羅氏史氏並可封才人錢氏可封長城郡夫人曹氏可封武威郡夫人勅位亞長秋道毗內理必資懿範方被寵章吳氏等佩服禮經周旋法度有柔婉之行旣表於天資有恭

儉之儀可施於嬪則慕班氏之辭輦偉馮媛之當熊思在
進賢義高前史是用列於紫殿冠彼後宮俾洽彤管之榮
式俟金環之慶可依前件

封長女等爲公主制

長女可封萬壽公主第二女可封永福公主第三女可封
西華公主第四女可封廣德公主第五女可封和義公主
第六女可封饒安公主門下諸女之封始資漢制疏邑之
典今爲國章長女等坤道稟柔條風育德莊敬柔順受粹
氣於靈源言容法度穆昭徽於內則祥降北渚教襲南薰

金定三月五
克茂天和更承姆訓雖年方齠齔而體備肅雍用洽寵私
俾開井賦可依前件

貶李德裕潮州司馬制

錄其自效則付以國權懲彼保姦則舉茲朝憲此王者所
以本人情而張法理也特進行太子少保分司東都上柱
國衛國公食邑三千戶李德裕憑藉鉉基累塵台袞不能
盡心奉國竭節匡君事必徇情政多任已愛憎頗乖於公
道升黜或在於私門遂使冤塞之徒日聞騰口積嫌之下
得以恣心豈可尚居保傅之榮猶列清崇之地宜加竄斥

以戒僻違嗚呼朕臨御萬方推誠庶物顧彼纖瑣皆欲保
安豈於將相舊臣獨遺恩顧而羣議不息謗書盈篋爰舉
典章事非獲已凡百寮庶宜體朕懷可潮州司馬員外置
同正員仍所在馳驛發遣縱逢恩赦不在量移之限

召募閒田制

君以人爲本人以食爲天有國有家捨此無急如聞州府
之內皆有閒田空長蒿萊無人墾闢與其虛棄曷若濟人
宜令所在長吏設法召募貧人課勵耕種所收苗子以備
水旱及當處軍糧

貶李回太子賓客分司東都制

王者懸賞罰以示萬方況乎臣子若奮其良術則宜擢處重位或挾彼邪謀固合稍加懲沮惟此二柄我何敢私湖南都團練觀察處置等使光祿大夫行潭州刺史兼御史大夫上柱國隴西郡開國公食邑二千戶李回早以藝學科名累登華貫謂爾奉公約已旋升大寮因緣獎遷遂陟台輔而不能竭誠以盡忠益枉道而求庇交通財賄導達姦邪昨因推鞠凶徒皆得發明事跡朕務宏體貌特免研窮論既喧騰理須移奪況又聞頃司政柄每欲除授咸取

決於德裕不自行其至公物議所興以斯爲重豈可猶委
澄清之任復領湘潭是宜輟從調護之班俾分洛邑勉莅
寵秩幸予寬恩可行太子賓客分司東都

貶李回賀州刺史制

爲臣竭公忠之誠朝尊爵賞事君乖毗倚之望國有典章
惟是二道理所不廢湖南都團練觀察處置等使光祿大
夫行潭州刺史兼御史大夫上柱國隴西郡開國公食邑
二千戶李回始以才術升於台階作予股肱亦援星律寄
長兼於授鉞道甚異於匪躬亦旣左遷俾居廉問而跡乖

檢慎事足端倪秉鈞之勢已移枉道之蹤乃見負我非淺
叨榮故深沉又聞頃司政柄應欲除授咸取決於德裕不
自行其至公人皆有言孽亦何逭朕匿瑕含垢思全進退
之宜爾則同力協心且易樞機之任合居嚴譴猶示寬恩
故前制命爾爲太子賓客給事中封還我勅且曰責坐之
詞至重降移之秩太輕物論喧然以爲未當爾實自構予
何敢私是用移謫臨賀冀厭羣議勉於三省勿謂無恩可
持節賀州諸軍事賀州刺史仍所在馳驛赴任

收復河湟制

自昔皇王之有國也曷嘗不文以守成武以集事參諸二
柄歸乎大寧朕猥荷丕圖思宏景業憂勤戚惕四載于茲
每念河湟土疆繇亘遐闊自天寶末犬戎乘我多難無力
禦姦遂縱腥羶不遠京邑事更十葉時近百年進士試能
靡不竭其長策朝廷下議皆亦聽其直詞盡以不生邊事
爲永圖且守舊地爲明理荏苒於是收復無由今者天地
儲祥祖宗垂佑左衽輸欵邊壘連降刷恥建功所謀必克
實賴樞衡妙算將帥雄稜副元元不爭之文絕漢武遠征
之悔甌脫頓空於內地斥堠全據於新封莫大之休指期

而就況將士等櫛風沐雨暴露郊原披荆棘而刁斗夜嚴
逐豺狼而穹廬曉破動皆如意古無與京念此誠勤宜加
寵賞涇原宜賜絹六萬匹靈武宜賜絹五萬匹鳳翔邠寧
宜各賜絹四萬匹並以戶部產業物色充仍待季榮叔明
李玘君緒各回戈到鎮度支差脚支送四道立功將士各
具名銜聞奏當議甄酬其秦威原三州并七關側近訪聞
田土肥沃水草豐美如百姓能耕墾種蒔五年內不加稅
賦五年以後量定戶籍便任爲永業其京城有犯事合流
役囚徒自今已後一切配十處收管溫池鹽利可贍邊陲

委度支制置聞奏鳳翔邠寧靈武涇原四道長吏能各於鎮守處遣官健耕墾營田即度支給賜牛糧子種每年量得斛斗多少便充軍糧亦不限約定數三州七關鎮守官健每人給衣糧兩分一分依常年例支給一分度支加給仍二年一替換其家口委長吏切加安存官健有莊田戶籍者仰州縣放免差役秦州至隴州以來道路要置堡柵與秦州應接委李玘與劉臯即便度計聞奏如商旅往來興販貨物任擇利潤一切聽從關鎮不得邀詰其官健父兄子弟通傳家信關司並亦不得邀詰阻滯如要墾闢種

田依百姓例處分三州七關如少器械長吏與量據所申
聞奏由除刺史關鎮使後三五月內差人巡檢如有修築
部署課績尤深并訓練有序者其刺史關鎮使雖新除官
爵亦更與超昇其官健節級更與優賞山南西道劔南山
川邊界有沒蕃州縣量力收復其兵士委本道差遣如要
錢物接借亦具聞奏三州七關創置戍卒且要務靜如有
羌戎潛來博易輒不得容納委刺史切加禁斷或有投降
吐蕃到邊上收取本道令長吏奏取進止嗚呼七關要害
三郡膏腴候館之殘址可尋唐人之遺風尚在追懷往事

良用興嗟夫取不在廣貴保其金湯得必有時詎計於遲速今則便務修築不進干戈必使足食足兵有備無患載協亭育之道永致生靈之安中外臣寮宜體朕意

再貶李德裕崖州司戶參軍制

朕祇荷丕業思平泰階將分邪正之源冀使華夷胥悅其有常登元輔久奉武宗深包禍心盜弄國柄雖已行譴斥之典而未塞億兆之言是議再舉朝章式遵彝憲守潮州司馬員外置同正員李德裕早藉門第叨踐清華累居將相之榮唯以姦傾爲業當會昌之際極公台之榮騁諛佞

而得君遂恣橫而持政專權生事妬賢害忠動多詭異之
謀潛懷僭越之志秉直者必棄向善者盡排誣貞良造朋
黨之名肆讒搆生加諸之釁計有踰於指鹿罪實見其欺
天屬者方處鈞衡曾無嫌避委國史於愛壻之手寵祕文
於弱子之身洎參信書亦引親昵恭惟元和寶錄乃不刊
之書擅敢改張罔有畏忌奪他人之懿績爲私門之令猷
又附會李紳之曲情斷成吳湘之冤獄凡彼簪纓之士過
其進取之途驕倨自夸狡蠹無對擢爾之髮數罪未窮載
闕罔上之由益驗無君之意使天下之士重足一迹皆讐

懼奉爾而慢易在公爲臣若斯於法何遁於戲朕務全大體久爲含容雖黜降其官榮尚蓋藏其醜狀而睥睨未已兢惕無聞積惡旣彰公議難抑是宜移投荒服以謝萬邦中外臣寮當知予意可崖州司戶參軍所在馳驛發遣雖逢恩赦不在量移之限

貶崔珙太子少師分司東都制

將相大臣與國同體誠欲自便豈宜不從苟非其時涉於避事前鳳翔隴州節度觀察處置等使光祿大夫檢校尚書左僕射兼鳳翔尹御史大夫上柱國安平郡開國公食

邑二千戶崔珙早以器能周歷顯重行已每稱其友悌在公亦竭其精忠自負譴前朝遠移南徼及我嗣守頗聞嘉名由是剖竹近關揚旂右輔爲國垣翰適資謀猷近者犬戎輸誠歸我故地下議納款且籌開疆宜其率先啟行副此寵待忽覽退閒之請頗乖毗倚之誠陳力之方豈無其道匪躬之故或異於是以其故老特爲優容俾居青宮之輔仍從分洛之命君臣禮分予無愧焉可太子少師分司東都

授濮王澤成德軍節度使制

門下錫珪立社踈戚有倫畫野分疆親賢並建所以左右
王室保乂邦家乃眷冀方實爲雄鎮上垂昴宿下接岳靈
控井陘之要衝當邯鄲之故地用是稽諸古訓考以國章
俾崇尚德之規式叶至公之選濮王澤延慶金枝䟽流天
派資忠孝以植性本仁義以立躬文掇菁英敏有逾於七
步學探旨要對必詳於三雍刻舟志邁於蒼舒占雨識高
於沛獻而冲謙自處矜伐不萌所宜作我翰垣副茲毗寄
爲臣之道爾旣克修知子之言予復何愧築齋壇以拜命
仗武節以遙臨爾其宏樽俎之善謀念折衝之遠略寵膺

十乘位列三台勉服新恩慎守厥職可開府儀同三司守鎮州大都督充成德軍節度鎮冀深趙等州觀察處置等使封如故

授唐技虔州刺史裴紳申州刺史制

朝議郎守尚書刑部郎中柱國賜緋魚袋唐技將仕郎守尚書職方員外郎裴紳早以科名薦由臺閣聲猷素履亦有可嘉昨者吏部以爾秉心精專請委考覈而臨事或乖於公當物議遂至於沸騰豈可尚列彌綸是宜並分符竹善綏凋瘵以補悔尤技可虔州刺史散官勲封如故紳可

申州刺史散官如故

授鄭涯義武軍節度使制

門下鮮虞舊國上谷雄藩總中山之甲兵接薊門之封壤
睠求良帥允屬碩臣銀青光祿大夫守太子賓客分司東
都上柱國滎陽縣開國男食邑三百戶鄭涯洪廓宏才易
簡正性雅量溟廣貞標嶽孤通鈐匱之奇書負珪璋之雅
器自發揚術業厯踐清途懿聞淑聲推爲茂德日者常膺
獎任屢鎮方隅惠愛洽於轅門謳歌溢於閭井洎謫居遐
徼旋處洛師惕厲日聞屯夷一貫是命載圖來效復議寵

遷於戲選將之難古今爲重而況易水之上尤藉謀猷爰
求惟舊之賢式重作藩之寄爾其勉思鎮馭益念訓齊惟
克己可以愛人惟推恩可以撫衆壞帳豈專於仁祖褰帷
宜嗣於賈琮俾外秩於春卿更增榮於亞相往承休命無
忝新恩可檢校禮部尚書使持節定州諸軍事兼定州刺
史御史大夫充義武軍節度易定等州觀察處置北平軍
等使散官勲封如故主者施行

加盧鈞尚書左僕射制

河東軍節度使盧鈞長才博達敏識宏深藹山河之靈抱

瑚璉之器多能不耀用晦而彰由嶺表而至太原五換節鉞仁聲載路公論彌高藩垣之和氣不衰臺閣之清風常在宜外揆路以表羣寮可尚書左僕射

授崔鉉淮南節度使平章事制

周用召公爲楨幹之臣以正天下故入調鼎鼎則弼亮之道尊出撫方國則藩宣之功著我有上相天實間生文武之用並高於昔賢中外之寄允資於碩德爰舉旌鉞仗於股肱光祿大夫守尚書左僕射兼門下侍郎同中書門下平章事兼宏文館大學士充太清宮使上柱國魏郡開國

公食邑二千戶崔鉉瑞玉凝姿春林發秀貞諒實德謙虛
葆光沖用旣臻於化源達實每宏於理本擅松桂後凋之
色勁節自高含金石希代之音正聲特異洎發揚令聞輝
藹公朝道無緇磷言符體要比相如之麗藻夙侍禁林嗣
傳說之旁求早膺台席日者厯居廉鎮嘗總朝綱令肅方
隅風行憲署及膺我寵擢復司化權每正惟公持平不撓
暢緝熙之茂典宏經緯之明謨功勒旂常道光夷貉勵山
甫匡周之操竭子房佐漢之志終始一心周旋七年富人
斯久僞緝凝愈勤是宜載圖爾庸優爾恩寵乃睠淮海號

爲通都控扼實據其咽喉封部適罹其災患予所注意爾
其往哉於戲居則秉鴻鈞紹阿衡之業動則駕長轂圖方
叔之勲苟非全才孰膺重任若撫封之長術阜俗之嘉謀
一部之慘舒三軍之政令我屬良弼則又何規勉登將壇
敬佩相印副是寵寄其惟戒哉可檢校尚書左僕射同中
書門下平章事兼揚州刺史大都督長史充淮南節度副
大使知節度事管內營田觀察處置等使

授令狐綯太清宮使魏謩監修國史裴休集賢殿

大學士制

門下太宮之崇嚴史閣之要重書殿之清秘近代以來率命相臣總統其務寵擢遷轉允諧舊規金紫光祿大夫門下侍郎兼兵部尚書門下平章事監修國史上柱國彭陽縣開國男食邑三百戶令狐綯上才經邦正德宰物瑚璉重器宜升清廟之中銀青光祿大夫守中書侍郎兼禮部尚書同中書門下平章事集賢殿大學士上柱國魏謩直道事主宏國佐時珪璋瑞姿早耀泰壇之上金紫光祿大夫中書侍郎兼戶部尚書同中書門下平章事上柱國河東縣開國子食邑五百戶裴休忠力許國清規立朝鸞鳳

異儀高舉重霄之外並富有天爵深於人文早懷匡濟之
資素蘊生靈之望洎處台位俾陳廟謨能肩一心以暢萬
務識我憂勤之旨罄其弼亮之誠邊疆寢寧風雨咸若念
此丕績懷於深衷今則各新寵章迭領重職所宜闡清淨
元默之化正褒貶刪詳之業因此嘉命啟吾規詞夫獻忠
言則君受益秉公心則人無怨除吏當則衆職舉下令一
則百度美乃吾三后前所施爲也余尚憂屬事重切磨終
始不虧乃曰良相綢可守本官充太清宮使蕃可守本官
監修國史休可守本官充集賢殿大學士散官勲封各如

故主者施行

授令狐綯宏文館大學士制

門下夫茂育羣生動資良弼緝熙庶績表正萬邦非竭力
戴君推誠憂國則何以光膺鼎鉉高步瀛洲十載於茲四
方無侮昭文講德屬自台臣金紫光祿大夫門下侍郎兼
兵部尚書中書門下平章事充太清宮使上柱國彭陽縣
開國男食邑三百戶令狐綯保合太和從容中道左右王
化清夷國風輔相盡天地之宜啟沃見忠貞之節直氣能
斷嘉猷日新納誨之心義形於色於戲發號出令表率寰

區妙運機樞式宏敷暢山甫補衮夷吾佐時勉極殊勲書
於太室朕以虛懷委遇於道始終佩服斯言敬承嘉命可
充宏文館大學士餘並如故主者施行

授鄭涯山南東道節度使制

門下王者之於元老碩臣優敬爲大苟有繫一作煩於庶務

則思尊以寵章中外迭居眷惟僉屬文武二柄揭而授之
況弄印之威望已行淚碑之風流未遠將疇茂績以繼昔
賢金紫光祿大夫御史大夫上柱國滎陽郡開國公食邑
三千戶鄭涯鶚鷺瑞時璵璠希代鑒澈止水氣融冬曦聲

塵獨邁於軒裳符彩迴高於倫列多士程準大朝羽儀禮
容全備於身文和易雅彰於心術自承明曉對建禮晨趨
參密命於北門演綸言於西掖相如雄麗咸推視草之工
孔光莊重空聞言樹之誠屢解交疑於都座兼尹正於二
原會府功著於彌綸神州政傳於表則洎登車按部仗節
總戎移風有佩犢之謠潔已有挂魚之操輕裘緩帶而師
律以貞投壺雅歌而氓俗自泰屬者干旄入覲宣室對敷
掌地征而天府旣饒執邦憲而朝綱載肅朕以漢臯巨屏
峴首名都將鎮上游必資全德是命輟於副相委以專征

仍兼揆路之榮以示啟行之貴敬踐乃位時惟懋哉可檢
校尚書右僕射守襄州刺史御史大夫充山南東道節度
使管內觀察處置等使散官勲封如故主者施行

除鄭朗工部尚書同平章事制

門下雲因龍興龍非雲無以施膏澤臣由君用君非臣無
以播皇猷信乎際會相須以康天下永念良弼常切寤思
詳求國楨乃獲時傑通議大夫守御史大夫上柱國賜紫
金魚袋鄭朗間代應期稟靈作瑞王室髦彥士林菁英溫
華凝珪玉之姿磊落負棟梁之任諫垣蘭省常推讜正之

風廉俗登壇克懋撫循之績洎領劇務益見盡忠杜邪徑而啟公途懲奸吏而絕私託饋軍無闕贍國有經委以憲綱尤彰直道是宜毗贊大業翊宣景化朕以區區齊晉取霸諸侯率由三賢叶心五臣同德況今四海爲宅百辟盈庭未能寇靖塞陞人歸壽域豈無長策俾及升平惕然疚懷莫知攸措肆予命汝往踐台阶勉宏濟代之功罔致曠官之誚善調兵食以備我邊虞慎舉典章以貞我庶品敬戒於位惟其有終可工部尚書同中書門下平章事散官勲賜如故主者施行

授畢誠昭義節度使制

門下築壇申命推轂就途受幢節之榮分藩閫之寄膺茲
重任允屬良臣邠寧鹽慶武等州節度管內營田觀察處
置兼充慶州南路救接鹽州及當道沿途鎮寨糧料等使
朝散大夫檢校工部尚書使持節寧州諸軍事兼寧州刺
史御史大夫上柱國平陰縣開國男食邑三百戶賜紫金
魚袋畢誠字量凝曠業履端修抱不器之才懷盡忠之節
聲馳文囿學茂儒林掇芳桂於月中擅嘉名於日下自外
朝籍累踐清班屢鎮邠郊彰績效得營平屯田之術有

伏波備寇之謀曠土多棲畝之糧窮塞無晏開之壘是宜
進律以勸將來尹於神州能安疲瘵卑張敞擒姦之稱鄙
廣漢摘伏之奇衢路絕赭衣之人閭井稀桴鼓之響用錫
武節明余無私乃眷壺關方擇良帥顧惟郇邑思繼成功
副我旁求俾爾俞往陟以五兵之秩升於八座之榮服茲
寵光佇聞報政可檢校兵部尚書兼潞州大都督府長史
御史大夫充昭義節度副大使知節度事充潞慈邢洺等
州觀察處置等使散官勲賜如故

授崔慎由平章事制

朕恭守睿圖勵精理道祇勤萬務靡不經心緬思垂拱以
化成莫若得賢而共濟載勞夢卜果獲貞良太中大夫守
尚書戶部侍郎判戶部事上柱國賜紫金魚袋崔慎由山
岳降靈和粹毓德儀標鸞鳳識洞著龜文爲國華行冠人
表朱紘含清越之呂良玉凝縝密之姿播英聲於士林彰
美望於公器洎擢參內署潤色王猷忠謹盡規誠明納誨
旣而廉問南服宣暢皇風盪寇銷災人安政集康一方之
疲俗復二職於中臺議論必本於古今趣尚自歸其雅正
淝河之右仍歲艱荒一自鎮臨載聞惠化俾司征賦益覩

公忠固可以升於臺階秉我大柄爰授相印用參樞務於
戲天地之道成歲功者陰陽帝王之基保鴻業者輔相念
茲匡贊之大宜竭啟沃之道必使貞百度以振國經凝庶
績以宏理本茂育區夏統和神人允資魚水之賢克致休
明之運永綏厥位無忝知臣可守工部侍郎同中書門下
平章事

授魏謩西川節度使平章事制

股肱之臣與君上而合體心腹之寄雖中外而同途入則
付之鈞衡出則委其藩翰苟非望隆碩德道備全才則何

以克副具瞻久膺重寄銀青光祿大夫守門下侍郎兼戶
部尚書同中書門下平章事監修國史上柱國魏謩天生
賢傑嶽降英靈深沈莫究其澄波和裕可羣於愛景自踐
揚華貫備著徽猷故事播於三臺讜論留於兩掖而式資
重用任以地征簡於朕心爰立作相惟爾列祖佐佑太宗
輔弼之光號爲人鏡代濟其美厥生令孫蘊致君匡國之
謀見奉上竭忠之志勤勞匪懈夙夜在公動關典彝言成
啟沃闡我皇化由其赤誠星霜七年風雨一貫朕以九折
巨屏三川奧區控臨百城統馭羣虜眷茲慎擇不其才難

爾宜往踐將壇仍持相印舉武侯之籌策底定遠戎繼叔
度之謳歌載康遐俗勉服休命恭惟有初可檢校戶部尚
書同中書門下平章事兼成都尹充劔南西川節度副大
使知節度事管內觀察處置統押近界諸蠻及西山八國
雲南安撫等使

授鄭朗監修國史崔慎由集賢殿大學士制

門下二相股肱與我同體致夷率化致俗清刑致戢干戈
致調風雨垂衣無事良有愧焉得不資刊削之能佇討論
之妙振揚史職開啟儒風予非敢私膺此並命通議大夫

守中書侍郎兼吏部尚書同中書門下平章事充集賢殿
大學士上柱國賜紫金魚袋鄭朗道苞時傑性蘊天和得
中庸之隱微合大雅之明哲太中大夫守工部侍郎同中
書門下平章事上柱國賜紫金魚袋崔慎由器稟人秀材
爲國楨達智者之變通有良臣之規矩皆學窮閭奧文擅
精華辦理必造於事機吐論同歸於根本松筠挺色莫畏
嚴霜鵬鶚凌空自有俊氣況協贊大政允釐萬方沃心克
聞舉直無隱圖是懿效彰其茂功斯用迭外俾洽嘉命主
張懲勸總領典墳必使書法彌精動契春秋之旨化成爲

重豈惟魚魯之文勉宏大猷罔俟沖驟朗可監修國史慎
由可充集賢殿大學士餘各如故主者施行

封衛王灌等制

門下朕聞先王建萬國親諸侯也周漢藩樹屏我國家以
錫土分茅沖人敢易彝制爰稽典禮式固邦家第三男灌
等生則岐嶷幼而徇齊忠厚實見其天資才識若符於神
授敦詩聞禮不假其師嚴踐義由仁罔勞於庭訓術通六
藝之妙學奧百代之書是宜敷桐葉之策舉梓材之誥胙
以土守誓以河山我圖爾居以謹王度無懈其位永孚於

休第三男灌可封衛王第十一男灘可封廣王宜令有司
擇日備禮冊命主者施行